

Kraut unn Riewe

(Michael Mende)

(Die Großmutter ist mit Kochen beschäftigt. Der Enkel Kay lungert lustlos herum und spielt mit seinem iPhone)

Großmutter: Hett'sch ruhig mit enn'd Kerch geh kenne. Wonn'i schunn koch fa alle mitennona. S'isch gut wonn der Mensch einen Glaube hat. Unn was hosch du?

Kay: (unwirsch) Hmm?

Großmutter: Was du hosch, frog'i?

Kay: Enn iPhone!

Großmutter: Enn was?

Kay: Oh Oma! Enn iPhone!

Großmutter: Enn Ei von? Enn Ei von ... vun wemm? Die Lämmmlers Thea hot gute Eier!

Kay: Och Oma, du kapiersch ah gar nix mehr.

Großmutter: Ich kapier, dass isch schaff unn Esse koch fa 6 Leit unn dass du faul do rumhocksch unn nix schaffsch!

Kay: Ja ja, isch jo gut.

Großmutter: Jetztat sei wenigstens so gut unn hol ma was aus mei'm Garte!

Kay: Oma, dein Garte isch enn Dschungl, e Wildniss isch des, do wächst doch Kraut unn Riewe durchenonna!

Großmutter: Do hosch recht! Enn rischdisch scheene Bauerngarte. Wu alles zommewächst was zommebasst. Awwa jetzt sei so gut, Kay, holl ma schnell e bissl Schnittlaach fa enn die Supp nei.

Kay: Ja ja. (macht aber keinerlei Anstalten zu gehen)

Großmutter: Jetzt geh schunn!

Kay: Gle...

Großmutter: **Glei, des weiß'i was des heißt, „Glei“ heißt „leck mich...“**

Kay: **am Arsch!**

Großmutter: *(wirft den Kochlöffel nach ihm)* **Du bisch enn olware Kerl, du! Sescht ma sowas?**

Kay: **Hey! Du hosch doch ogfonge!**

Großmutter: **Du, Kay, sag' emol: Fährsch heit Owend widda zu deiner Freindin nach Heilischkreizdunnaweddl *(Heiligkreuzsteinach)* odda wu sie her isch?**

Kay: **Was geht donn dich des oh?**

Großmutter: **Hosch noch genung Benzin?**

Kay: **Ja ja, ich geh joh schunn enn dein Garte! Wie heißt des Zeig?**

Großmutter: **Schnittlaach heißt des Zeig.**

Kay: **Unn wie sieht des aus?**

Großmutter: **Ha du wärsch doch wisse, wie Schnittlach aussieht. Ä grünes Kraut, glei wonn'd neikummsch uff de rechte Seit!**

Kay: **Alla gut *(Geht ab, kommt zurück mit Petersilie)* Da! Danke! Bitte!**

Großmutter: **Oh Buh! Du kapiersch awwa ah gar nix, des isch Peederling, Petersilie du Hornjärg! Gut, die konn'i fa de Salat nemme. Kumm jetzt laaf nochemol nunna unn holl ma den Schnittlaach.**

Kay: **Ah kumm, Oma, isch hab kohn Bock mehr.**

Großmutter: **Sundtags schlage sie immer uff mi'm Benzin, die Seckl, gell?**

Kay: **Alla gut, wie sieht'a donn jetzt gonz genau aus, dein bleede Schnittlaach?**

Großmutter: **Guck, die Petersilie, die isch sou gruselisch**

Kay: **Sou wie du!**

Großmutter: **Sei still Dabba! Schnittlaach isch long! Longgezoge unn grie!**

Kay: *(geht ab)* **Long unn grie, Leit, Leit! *(zurück mit Lauchstangen)* Do hosch grie unn long.**

Großmutter: **Ah du Rindviech, des isch Laach!**

Kay: **Haja, du wolltsch doch Laach, Schnittlaach!**

Großmutter: **Ja Schnittlaach awwa kohn Porree du Simpl!**

Kay: Kumm, bin isch Gärtner odder was?

Großmutter: Jetzt mach i ofach e Laachgmies dezu. Ach Gott, isch hab jo sowiesou noch gar koh Gemies ghabt. Holl ma schnell noch enn Kohl, des wersch jo nobringe.

Kay: Kohl? Wie sieht donn der aus? Wie e Birne odda?

Großmutter: Ah sare mol, ihr junge Leit wißt joh gar nix. Wie sieht donn Kohl aus: Rund unn grie, wie sou e Kugl halt, odda enn Fußball mit Blätter!

Kay: Klar, wonn's weiter nix isch. Spezialaufgabe im Dschunglcamp. Suche den Fußball in der Wildnis! *(ab, kommt zurück mit einem Buchsbaum)*

Großmutter: Ah Buh, du mesch mich noch varrickt. Solle ma jetzt enn Buchsbohm fresse?

Kay: Oh weisch Oma, jetzat mach'i grad gar nix mehr. Dir kann ma doch überhaupt nix recht mache.

Großmutter: Des werd's Bescht sei. Do keent'i joh grad die Katz nunna schicke, die det des noch besser nohbringe als wie du!

Kay: Ja kumm, sei so gut! Schick die Katz nunner! Die kennt dein Garte eh bessa! Die scheidt jo immer nei!

Großmutter: Sei nett sou garstig mit dem arme Tier. Wu isch sie donn iwwahaupt? Ach hajo, die schläft joh uff'm Ringlobohm. Um Himmels Wille die Ringlo haw'i gonz vergesse. Die senn iwwareif, die messe runna, sunscht verfaule sie noch. Kumm Kay, holl ma noch schnell die Ringlo.

Kay: No, dir kann ma doch nix recht mache.

Großmutter: Ah kumm, jetzt mach schunn. Des konnsch nett emol du verkehrt mache. Der Bohm hängt proppevoll. Die konnsch nett iwwasehe.

Kay: S'letschte Mol, dass ich enn dein Garte geh, des sar'i da! Wie sehe die aus, die Dinga?

Großmutter: Gelb und rund! Konnsch nett iwwasehe!

Kay: Gelb und rund unn nett zu iwwasehe, alla gut! *(ab, kommt mit einem Kürbis zurück)* Alta, sauscher die Dinga. Unn hänge sautief Oma, wasch des?

Großmutter: Ah Buh! Du bisch doch sou bleed wie e Päckl Omo! Des isch enn Kürbis.

Kay: *(legt sich wieder hin)* Nix mach isch jetzt mehr, gar nix. Scheißgarte doh! Ringlo, Laach, Buchskohl, jetzt mach isch nix mehr!

Großmutter: *(nachdem sie ihn kurz beobachtet hat)* Kumm Kay, sei so gut

Kay: Nee, Oma, ich geh nimmi enn dein Garte, fertisch!

Großmutter: No, nimmi enn de Garte, des dutt nett. Awwa do, nimm de Krug unn hol ma schnell e Kriegl Moscht ruff. Donn trinke mer ohna!

Kay: Alla gut, vunn mir aus. Wu ischer donn?

Großmutter: Des grouße braune Faß. Des uff de linke Seit, hosch verstonde?

Kay: Ja ja, geb schunn her.

(Kay geht ab und kommt mit vollem Krug zurück, die Großmutter gießt ihnen beiden zwei große Gläser ein)

Großmutter: Donkschee, Kay. Alla donn, Prost!

Kay: Prost Oma. (schreit auf und hält sich den Hals) Ah, was isch donn des? Des isch doch Schnaps! Des isch doch Selwagebrennte, oder?

Großmutter: (genießend) Haja, den haw'i jetzt gebraucht! (zum Publikum) Weil, wißt'a: Wonn'i dem gsaat hed, dass isch jetzt enn Schnaps brauch, hed der mir enn Moscht odder e Wassa ruffgebracht.

Wonn dem awwa s'Vakehrte sesch, donn meschda's Rischdich!

Proscht!